

Զուրխմինէր՝ փոքր փառչէր. ազատ չափերի են լինում:

Հատկապես ծէք՝ ձեթը չափելու համար գործ է ածվում պըծուրիկը—1, 2, 3 և 5 գրվանքանոցներ:

Գնվաթ⁷. գործածվում է կերակուրը բաժանելու համար. խաղում է խոր ափսեի դեր, բայց չունի սրա լայն պոնկանգրերը, չունի և լնք: Բերանի մոտ հզրերը բարակ են և նեղ են մնում: Բերանը լայն, հատակը նեղ և սեղանին ամուր դրվելուն հարմարեցրած: Նրանից ուտողը գործ է ածում գդալ, բայց ավելի հաճախ ուղղակի հինգ մատները—հացի՝ լավաշի մեջ կերակուրը հավաքելով: Գնվաթը շատ դեպքերում գործածվում է նաև մածուն մերելու, կաթ պահելու համար:

Ըղամաններ՝ աղամաններ. պուլուր-պուլուր՝ կլոր կամ այլ ձևի շինված:

Ճրաֆ. մեջը լցվում է կամ միայն ձեթ՝ ծէքի ճրաֆ կամ սև ճօք՝ ճօքի ճրաֆ: Պոռնկը մի կողմից առաջ է քաշված շրթնաձև սրածայր կտուցով՝ պատրիֆի՝ պատրույգի համար: Խաչին ուխտագնացության ժամանակ նվիրվող ճրագը չօրսու ա՝ պիտի լինի քառակուսի, պետք է վառվի անպատճառ ձեթով և չորս անկյուններից ամեն մեկի մեջ պիտի լինի մի-մի պատրույգ:

Խնոցինէր. երբեմն կավից են շինվում, բայց գրեթե ամեն տեղ ավելի գործածական է փայտե խնոցին: Կավից շինվում են համեմատաբար փոքր տեսակները: Կապանի հարավային գյուղերում, ինչպես Մեղրու շրջանում, ավելի գործածական է գետնին դրվող կավե խնոցին:

Կավից շինում են և այլ հատուկ նպատակ հետապնդող ամաններ, օրինակ՝ ծուէփի՝ մեջը ձու եփելու համար, լայն ուղբով և նեղ ռէխավ կարճ աման:

Պղնձե ամաններ: Ավելի բազմատեսակ են պղնձե ամանները: Պղնձից շինվում են տարբեր մեծության և՛ կճոճներ, և՛ կոժէր, և՛ ֆթէնէր և՛ փառչէր, և՛ մանավանդ գոճգոճմէնէր: Պղինձը թույլ է տալիս արտաքին հարուստ փորագրական նախշազարդում: Ունեւոր տների մեջ հանդիպում էին չափազանց բարձր գեղարվեստական գործեր, զանազան մեծության կաթսաներ, ղրզղանների՝ ժողովածուների մեջ: Նրանք այստեղ կրկնում են սովորական ձևը, այն է՝ հատակը բերանի համեմատությամբ շատ ավելի լայն, ուղբ դեպի վար ուռուցիկ, բերանը լնքավ՝ կրակի վրա դնելու-վերցնելու համար: Ղրզղանի ամենամեծ տեսակը կոչվում է շարխի ղրզղան:

Միայն պղնձից են շինվում լնքավօր լնգանները՝ կլոր տաշտերը, որոնց փոքր տեսակները կոչվում են լնգանչա: Բոլորովին նույն ձևի է և մրբթա՛րան, որի միջից կերակուր են ուտում: Հատկապես գութանավորներին դաշտ կերակուր տանելու համար ծառայում է կոճքանի լնգանը: Սա տարբերվում է գրեթե ուղղահայաց կողերով ուրիշ լնգաններից: Լնգանի մեջ պահում են կաթը, բերանը մի բանով կապում են և միառժամանակ անց՝ միջի կաթի երեսը քաշում են:

Բըղիա. իր քիչ շատ ուղղահայաց և գրեթե բերանին հավասար, բայց ոչ հարթ, այլ դեպի վեր ուռած ուղբով նման է լնգանին, որը նույնպես լնքավ է, բայց համեմատաբար ավելի խոր է և տակից ունի կլոր և ցածրիկ հավելված՝ օղ՝ պատվանդան: Սա ամենաբազմազան նպատակների համար է ծառայում, գլխավորապես մածունը մերելու, կաթ և ամեն տեսակ հեղուկ կերակուր պահելու համար: Ծառայում է նաև որպես չափ՝ կոնշի փոխարեն:

⁷ Մեղրու բարբառով՝ գէ՛վաթ: Չպետք է խառնել գրական լեզվի մեր գործածվող գավաթ՝ կոչվող ամանի հետ: